



Tir Yimiyim

www.tirymiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymiyim@gmail.com

TAPAK 8

Yangia anidakangma :

f Tir Yimiyim

Instagram tirymiyim@aolima

YouTube tir yimiyim

TAPAK 7



US tir Ronald Reagan dak akhasang chioktsü



Navjot Singh Sidhu-i Congress tir mapa toktsü

VOL. XVIII NO. 347 (ADOK 347) DIMAPUR

RASEMNÜ (WEDNESDAY)

RONGJUI (SEPTEMBER) 29, 2021 ₹ 5.00

Oct 30 nü 58-Shamator-Chessore (ST) by-election agitsü

Dimapur, September 28, 2021 (TYO): Election Commission-i Mongulbarnü 58-Shamator-Chessore (ST) Assembly Constituency nung October 30, 2021 nü by-election agitsü osang metetdaksüogo.

ECI-i October 1 nü gazette notification agütsüsü aser October 8 tashi nung candidate temi nominations asütsü akok.

October 11 nü nomination papers reprangtsü aser October 13 tashi nung candidate temi

tenüng meyipa agitsü akok. Iba sülen October 30 nü by-election agitsü aser November 2 nü votes azüngtsü.

Tanü nungi Tuensang district nung Model Code of Conduct (MCC) tenzüker aser iba nung candidate, political party aser State Government ajak adener.

Nationalist Democratic Progressive Party (NDPP) MLA Toshi Wungtung asüba ajanga iba menden tazüng aküm.

Central Nagaland Tribes Council-i metetdaksür

Dimapur, September 28, 2021 (TYO): Ao, Lotha aser Sumi nungertemi Dimapur Tribal Hoho Forum nung shilem magitsü aser telok tasen kecha dena mesendakteptsü, ta Central Nagaland Tribes Council (CNTC)-i ashi.

Dimapur nung telok tejentiba Naga Council Dimapur (NCD) den CNTC noktaka lir aser NCD o Dimapur nung alirtem telongjem raksatsüsü merangba telok kecha dena madentsü, ta CNTC-i Mongulbarnü metetdaksü.

CNTC-i Foothill Road mapatong metembang tashi Nagaland Foothill Road

Coordination Committee (NFHRCC) den yariteptsü. Sorkari iba mapatong atema nangzükba ama inyaksü imlar, ta parnokisa ashi.

"Kin 14-i Naga yimten tebilemsü atema lemtetba nung CNTC-i pusema nungiter aser tekaratiba nung telemtetba agitsüla ta nenshir. Küm aika Naga yimten olemtep lia aruba ajanga telok balalai tax saruba ajanga nübortem kanga timtemer. Nübertemi azütokshitep anendaktsünür aser tetsüba kecha melii yimjung nung linür" ta CNTC-isa sangdong ka nung metetdaksü.

Minister Tongpang Ozukum-i ICIT semdang

Dimapur, September 28, 2021 (TYO): September 28, 2021 nü PWD Minister (Housing & Mechanical) aser Mokokchung DPDB Chairman, Tongpang Ozukum-i Institute of Communication and Information Technology (ICIT) semdang.

Iba mapang Principal ICIT Er. David Tsela-i Minister Tongpang dang institute semdangba atema pelaba metetdaksü aser reju dak sendakba onük kar lemsatop.

Er. David-i Minister Tongpang dang "Electrical and Electronics Engineering" aser "Civil Engineering" diploma program tenzüksü nungdakba indang ashi.

"Alima renlokba aser technology ainba ajanga electrical & electronics engineering nung technicians aser civil engineers kanga nungdaka kümogo. Item asoshi diploma program tenzüksü ajanga reju nung

kaketshir teimba akümsü" ta Er. David-isa ashi.

"Naga lanurtemi state sorkar dak mapa angutsü meimlai Nagaland-i aruba start ups nung inyaksüla. Talisa electrical aser civil engineering mapatongtem nung shilem agitsüla" ta Minister Tongpang-ia o jembidang ashi.

Mokokchung DPDB chairman ka ama pai akokba tashi yariteptsü aser bangdak department o state sorkar dangi onüktem abentsü ta Tongpang-i nangzük.

Mongulbarnü paisa Mokokchung district nung Road & Bridges division ajak nungi executive engineers, National Highway aser Mokokchung Milk Union den ajurutepa sensaksema liasü.

Minister Tongpang-isa Mokokchung jila nung recreational park yanglutsü aliba tesem semdang.

Oct 2 nü Dimapur nung lokti nübodoka mapa inyaksü

Dimapur, September 28, 2021 (TYO): Dimapur District nung Gandhi Jayanti amongtsü atema October 2, 2021 nü lokti nübodoka merükmeju mapa inyaksü, ta Deputy Commissioner, Rajesh Soundararajan, IAS-i metetdaksüogo.

Dimapur district kübok Government Institutions/ Offices/Colonies/Wards/Villages anepdang 6:00 ako nungi mapa tenzüksü anungji HODs, Heads of Offices, Ward/ Colony

authorities, Village authorities-i pei pei telongtet nung iba mapa inyaksü atema renemtsüla, ta paisa ashi.

Maneni, Administrator, Dimapur Municipal Council, Town Councils nung Administrators, Hq/ Outpost Administrative Offices ajanga jana bendena endoktsü atema ketdangtsüsü nungloktsür, ta Dimapur DC-isa metetdaksü.

Iba mapang COVID-19 inyakyim beshitsü ta paisa shisem.

Nagaland sorkari Unlock-7 indang metetdaksür Tensa Tajungba Kümra Nov 1 Nungi School Lapoktsü

Kohima, September 28, 2021 (TYO): Mongulbarnü Nagaland state sorkari October 31 tashi COVID-19 lockdown alitsü saka talenba talila salatsüsü telemtetba agiogo.

"Chief Minister Neiphu Rio menden ser High Powered Committee (HPC) on COVID-19 Nagaland senden amendang iba telemtetba agi" ta government spokesperson & minister Neiba Kronu-i ashi.

Tanü senden nung aonung curfew ghonda ka salatsü telemtetba agi. Unlock-7 mapang aonung 10:00 ako nungi

anepdang 4:00 ako tashi curfew alitsü, ta pai ashi.

HPC-isa tekülem kitem aser tamangba yimsü dak sendakba tesemtem nung nisung 100% adenshitsu melar, saka lateta aliba SOPs sülen anidaktsüla aser teti covid appropriate behaviours (CAB) beshitsüla, ta Minister Kronu-isa metetdaksü.

CAB sülen anidaka saisapong aser lokti sentongtem agitsü melar ta paisa ashi.

"October 1 nung class 5 aser temapurtem asoshi school lapoktsü. HPC-isa tensa tajungba kümra November 1 nungi pre-

primary levels dena shisaliok reju ajak lapoktsü telemtetba agiogo" ta paisa shisem.

Tangalen nungi arurtem dak railway station aser airport nung maneni tendangtsü. Vaccine dose anaprong agir mesüra ka agiba sülen anogo 15 süirtem ajak Nagaland-i arutsü melatsü, ta Kronu-isa metetdaksü.

"September 13, 2021 nü HPC senden nung Hornbill Festival amongtsü lemtetogo aser iba asoshi Health, Tourism aser line department tem den senden ka mena sentong renemtsü" ta paisa ashi.

COVID-19 Nagaland: 51 taneptsü angu, 28 dak putet & 1 asü

Kohima, September 28, 2021 (TYO): Nagaland nung tanü agi anogo asemubaba COVID-19 puteter dang nungibo taneptsü angur teimba liasü. Tanü nisung 51 taneptsü angu aser 28 dak putet.

"Testüba ghonda 24 tsüngda COVID-19 puteta alir nisung 51 taneptsü angu. Parnokji Dimapur nung 29, Kohima nung 10, Wokha nung 5, Mokokchung nung 4 aser Kiphire, Peren o Phek nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang nisung 28 dak COVID-19 putet. Parnokji

Dimapur nung 15, Kohima nung 7, Mokokchung nung 3, Phek nung 2 aser Wokha nung 1 lir" ta paisa ashi.

Nisung 31,195 nungi 29,145 taneptsü nguogo aser ibaji 93.42% lir, ta paisa shisem.

Tang nisung 401 anepaludar saka parnok 301 dakbo shirangba yimya kecha mali, ta Dr Kikon-i metetdaksü.

Mongulbarnü Dimapur nung COVID-19 puteta alir ka asüba züngsema tasür ajak agi 664 kümogo saka parnok 15 dakbo tanga tashidak liasü, ta paisa ashi.

"Hombar tashi nung nisung 685,081 nem COVID-19 vaccine

indang dose 10,31,858 agütsüogo" ta State Immunization Officer, Dr Ritu Thurr-i ashi.

Vaccine agirtemji frontline workers 60,924, healthcare workers 15,996, arishi küm 45 ser temapur 197,703 aser arishi küm 18 nungi 44 tsüngda alir 410,458 lir, ta paisa ashi.

"Vaccine agirtem rongnungi nisung 346,777-i dose anaprong agiogo. Parnokji frontline workers 47,218, healthcare workers 13,243, arishi küm 45 ser temapur 134,908 aser arishi küm 18 nungi 44 tsüngda alir 151,408 lir" ta Dr Thurr-isa metetdaksü.

NSCN (IM)-i Arunachal MLA tem amokmerenba aitsür: ENNG

Kohima, September 28, 2021 (Agencies): National Socialist Council of Nagaland (IM)-i Arunachal Pradesh kübok Tirap, Changlang aser Longding (TCL) district tem nungi MLA tem dang sorkar den meyariteptsü tetuyuba agütsüba aitsür ta Eastern Naga National Government (ENNG)-i metetdaksüogo.

NSCN(IM)-i züluba shidi ka social media nung prokshir aser iba nung Tirap, Changlang aser Longding (TCL) district tem nungi Nocte, Wancho aser Tangsa kintem nungi village chiefs, gaon buras aser panchayat züngsemtem Dimapur, Nagaland nung September 29 & 30 anogotem senden amentsü jaoka lir.

Taküm August ita yanglushiba scheduled tribes indang constitutional list nung "any other Naga tribe" agienba atema NSCN(IM) mepelar. Arunachal

nung Monpa, Sajolang, Sartang, Tai Khamti, Mishmi-Kaman (Miju Mishmi), Idu (Mishmi), Taraon (Digaru Mishmi), Nocte, Tangsa, Tutsa aser Wancho lisopur kintem dendaktsüsü atema scheduled tribes meyipa reprangshia liasü.

"August 2021 nung union parliament bill agizükba nung 'Naga' olong agienba atema tejashi nung NSCN (IM)-i MLA aser minister tem amokmerenba khukhua aitsür. Arunachal Pradesh kübok Tirap, Changlang aser Longding district tem nung Tangsa, Wancho, Nocte, Tutsa aser Ollo kintem scheduled tribe list nung agizükogo" ta ENNG-i sangdong ka nung ashi.

"TCL nung alirtem ya alima ajungai metetba Naga kin nungi lir aser Naga kin kübok Tangsa, Wancho, Nocte, Tutsa aser Ollo tem ya sub-tribes lir. Nisung ajaki parnok ya Naga nung ta meteta

lir" ta ENNG-i ashi.

Ajisüaka, Patkai arrtsü adena Myanmar nung alir aser asenok linük balala nung liaka kasa Naga nung dang lir. Anungji onok Naga nung asü masü ta asüba tasüngdangba kecha madoker" ta parnokisa ashi.

Nagaland nung Angami, Ao, Sema, Lotha, Chakesang aser Konyak ama kin balala lir saka parnok ajak Naga kintem lir, ta ENNG-isa metetdaksü.

NSCN (IM)-i amokmerena züluba shidi ya tai aser iba ajanga TCL district tem nung alirtem tsüngda mangatetep adoktsü. Anungji NSCN (IM)-i TCL nung alirtem nem timtem magütsüsü mepishir, ta parnokisa ashi.

ENNG-isa public lennirtem, village chiefs, gaon buras aser panchayat züngsemtem dang NSCN (IM)-i ayongba senden nung madentsü metetdaksüogo.

Athuan Abonmai tepsetba atema nisung 2 apu

Guwahati, September 28, 2021 (Agencies): Taoba Zeliangrong Baudi (AMN) president Athuan Abonmai tepsetba dak sendakba nung Manipur Police-i nisung ana puogo. Police-i temolung melemi bilema apuba nisung anaji Ponthalung Panmei (47) aser Lanchapou Bosco Gonmei (48) na ta jangjaogo.

Tena CJM Imphal West Judge tsüngdang anir ao aser okadaki anogo 9 tashi tepuokdak ayutsü temelaba agütsü.

Abonmai mang anasa martol ka angu aser iba jagi pa tepset ama

temolung malemer ta police-i ashi.

Social activist Athuan Abonmai tepsetba sülen Manipur nung nisungtemi pa atema temeten meshia lungkak aitsü tenzüka liasü.

Manipur Chief Minister N. Biren Singh-ia security mapa shitak meinyakba ajanga pa asü ta nangzükogo.

Külen, Manipur Congress-ibo district nung District Magistrate (DM) aser Superintendent of Police (SP) naprong mapa nungi anentsüsü takhangba agütsüogo. Congress-isa High Court judge

ka ajanga bushisüngdang asütsü takhangba agütsür.

NSCN (IM) züngsemtemi Athuan Abonmai tepset asütsü akok ta Manipur Home Department-i temolung melemi bilema sülen September 26 nü iba ken o NIA nem bushisüngdang asütsü agütsü.

September 22 nü Athuan Abonmai indang mangji Tamenglong-Tamei road nung angu.

Tamenglong district nung public sentong ka nungi Abonmai pur ao aser iba sentong nung Manipur chief minister-a aden.

2021 JCB Prize for Literature atema 'longlist' sangdongogo



Dimapur, Rongjui/Sept. 28 (TYO): 2021 JCB Prize for Literature agütsütsü asoshi shimtsü atema tenüngtem bendenba September 27, 2021 nü sangdonga liasü. Taküm iba sempet agütsütsü asoshi shimtsü atema sangdongba 'longlist' nungya timba kakat zülur tasentem lir, kong par trok bo tang mezüngbuba kakat zülurtem alitsü.

Item rongnung nisung asembo oshi meyipzükba

Peren nung Communitisation Act 2002 rebrangshiba senden ka aka

Dimapur, Rongjui/Sept. 28 (TYO): Communitisation of Public Institutions & Services Act 2002 indang convenor, Banuo Z Jamir, IAS (Rtd) den member secretary John Lohe aser danga ktdangsurtemi September 27, 2021 nü Peren semdanga District indang Administrative Officers aser Heads of Offices tem den district level shisadokten senden ka Deputy Commissioner, Peren indang Conference Hall nung agia liasü.

Iba senden nung jembiba mapang, committee ya taoba küm July ita Communitisation of Public Institutions & Services Act, 2002 nung tashi mait aser tashi ita alibatem

Kohima nung GPDP indang People's Plan Campaign training agütsü

Dimapur, Rongjui/Sept. 28 (TYO): Gram Panchayat Development Plan indang People's Plan Campaign nung sendaktepa aliba department nem anogo ka training September 28, 2021 nü DPDC Hall, Kohima nung agütsü liasü.

Deputy Commissioner, Kohima, Gregory Thejawelie, NCS ajanga iba campaign indang rateta ashiba mapang Gram Panchayat atema sentong yangluba aser terenlok mapa kanga tongtipang lir, ta ashi.

India ya yimtsüngtem agi sünga lir aser India renloktsü atema yimdk-yimtsüngtem renloktsü nungdaker, aser ibaji Gram Panchayat renlokba ya alitsü, ta pai ashi.

Tesem aika nung makamait agi sünga lir aser loktiliba nung mapa meshidak inyaker, anungji itemji anepalu masü tashi linük nung terenlok agi anünga alitsü, ta Thejawelie-i ashi.

Nüjiso anguba mapang nungi Panchayat ka alitsü ya inyakyim ajak nung tongtipang südakja aru, rongsenketzüng

(Malayalam nungi) atema lir. Iba longlist ya state 16 nungi kakat zülur aikati oshi balala nung kakat zülua August 1, 2020 aser July 31, 2021 tsüngta adokertem alitsü.

Nisung pungo agi akumba judges temi otsü kakat ter shimtet: Sara Rai (Chair), kakat zülur aser oshi meyipzüksür; Dr Annapurna Garimella, designer aser art historian; Shahnaz Habib, kakat zülur aser oshi meyipzüksür; PremPanicker,

asadangtsü atema tenteta liasü, ta Banuo Z Jamir-i ashi. Yimtsüng sasep nung terenlok mapa nung Communitisation ajanga kongshiba tejangja metettsü atema parnoki Peren semdang, ta lai ashi.

Laisa sendaktepa alba Department ajunga atema tasüngdangbatem langzüksü atema PowerPoint ka sayu aser ktdangsurtem dang ochishia pei tangatetba shidak langzür October 15, 2021 tashinung email ajanga agütsütsü shia liasü.

People's Plan Campaign 2021-2022 dak sendakba nung sendaktepa aliba Department ktdangsurtem den district level orientation sentong ka District Rural Development

asocial justice inyakyim renemba aser mapa kuma inyakba nung shilem agidaksür, anungji Article 243 nung Panchayat indang shia lir, kong Panchayat mapa aser shilem tejangja shia lir, ta pai ashi.

People's Plan Campaign ya October 2 nü tenzüka January 31, 2022 tashi akatsü aser subject 29 nung rangloker Panchayat sentong yanglua mapa kuma inyaksü atema training ya agütsür, ta Kohima DC ajanga ashi.

Pai sendaktepa aliba department ajunga dang item mapa shidak inyaka aotsü atema kati ka yariteptsü ayongzük aser tawa alibatem jangjatettsü, metokmeperi metetdakja lenmang sayutsü aser shilem agia lokti nung temelenshi bener arudaksütsü ajungshia liasü.

Rural Development Officer, Rural Development, Vilopi Angami ajanga training nung jembiba mapang, rongsenketzüng terenlok aser social justice atema Gram Panchayat Development Plan

osangbener aser yimo zülurr; aser Amit Varma, kakat zülur aser podcaster.

JCB Prize for Literature ya küm shia India nung kakat zülurtemi fiction alakteta züluba atema agütsür. Tetendanger temi title pungo atema shimtetertem October 4 nü sangdongtsü aser sen lakh 25 JCB Prize for Literature nung takok angur ya November 13 nü sangdongtsü.

Takok angur mapa ya oshi meyipzükba atema asünungbo, oshi meyipzükba ya ano talila sen lakh 10 angutsü. Shortlist nung aliba kakat zülur nisung punogo nemya nisung shia sen lakh ka-ka agütsütsü, shortlist nung shimteta alir ya oshi meyipzükba asünungbo oshi meyipzükba nem sen 50,000 agütsütsü.

COVID dak sendakba tenokdangbatem linük tesem ajungalen lir asünung, taküm agi küm pezübuba JCB Prize for Literature ya Amazon Books India den lungiemer agütsütsü.

Agency, Peren ajanga Deputy Commissioner, Peren indang Conference Hall nung agia liasü. Iba sentong nung Deputy Commissioner, Peren, Sentiwapang Aier, NCS menden liasü aser Project Director, Moa Sangtam ajanga Gram Panchayat Development Plan (GPDP) indang tongmelang agi rateta ashi aser ADPM (DDMU), Ruuvilie Kotsu-i Village Poverty Reduction Plan indang PowerPoint presentation agütsü liasü.

Iba campaign takok angutsü asoshi Project Director, Moa Sangtam-i sendaktepa aliba department ajunga dang amalitep akatsü ayongzükba liasü.

(GPDP) renemtsü asoshi Gram Panchayats ya tongtipang kumogo, ta ashi.

Constitution indang Eleventh Schedule nung shia aliba subject 29 dak sendaka aliba Central Ministries/Line Departments dak sendak scheme ajunga renemba nung Gram Panchayat shilem tulu lir, ta pai ashi.

Ajidang masü India nung yimdk-yimtsüngtem melenshitsu atema sentong balala inyakba nung Panchayat yagi tongti shilem agitsü lir, ta Vilopi Angami-isa ashi.


Paisa campaign yimya nung GPDP renemtsü atema 'People's Plan Campaign (PPC)' ya tongtipang lir aser iba campaign ya 'Sabki Yojana Sabka Vikas' nungja agütsür October 2, 2021 nungi January 31, 2022 tashi akatsü, ta metetdaksü.

Iba training nungsa PPC nükjidong, State Departments, Nodal Officers, Facilitator aser Frontline workers tem shlem aser parnoki inyaksüba mapatem angazükdakja liasü.

Kohima nung sen ayuar ajener nisung tanabuba puogo

Dimapur, Rongjui/Sept. 28 (TYO): Kohima nung SBI Main Branch anasa doctor ka indang gari nungi anüngdang mejangjaba nisung ana mask agir prangbong bener arua sen lakh pungo ayuar aoba ken o nung tai tonglokja alir nisung tanabuba, arishi küm 51 tain Zelhoulie Mets puogo, ta sangdong ka ajanga ashi.

Iba nisungba ya September 28, 2021 nü Kohima Police temi apu aser pa ket nungi auyaba sen 2,50,000 ngutetogo, ta sangdong ajangasa ashi.



Tourism Department pur senden ayonger

Dimapur, Rongjui/Sept. 28 (TYO): Director, Tourism, Ajanuo Belho ajanga sangdong ka nung ashiba agi, aruya aliba 22 buba Hornbill Festival 2021 dak sendakba ken o jembitsü atema Tribal Hoho/lokti tentet ajunga den shisadokten senden ka October 1, 2021 (Hokulbar)

nü anepdang 11:00 ako nungi tenzüka Directorate of Tourism Kohima, Nagaland indang Conference Hall nung alitsü.

Iba dak sendakba nung Tribal Hoho shia nungi teshimtet nübu/züngsem ana arua senden nung adentsü mepishir, ta sangdong ajangasa ashi.

Jangpetkong tzükong lenmang tebilemstü indang jembiba

Dimapur, Rongjui/Sept. 28 (TYO): Jangpetkong Pastor & Asso. Pastor (W) Telongjem (JPAPWT) ajanga September 28, 2021 nü senden ka Alongkima Baptist Arogo nung ayongzükba tzükong lenmang tebilemstü indang yimtsüng shia nungi Village Council Chairman den yimsüsür aser Arogo nungi deacon arua jembitepa liasü. Iba senden nung nisung 50 shi dena liasü.

Senden nung Arogotemi taküm (2021) küm pei pei litsü

nung rongsen aser nübu jenti indoka tzükong lenmang yanglushiba aser ano Arogo kari inyaksü aliba osang agitep aser pelaba lemsatepa liasü.

Tsüngremi molungba dang süra JBPAPWT lenisüba nung tzükongsanger sensopur nungi temolunger tenlatem bendentsü aser rongsen yari lenmang yanglushiba nung maneni shilem agitsü, ta iba senden nung telemtetba agi. Item mapa küma aodang yimsüsürtemia nungita yariteptsü telemtetba agia liasü.



Peer Team züngsem asem, higher education wadang nungi tejangja nübu, Dr. Padmanabhan Thiyagarajan (Chairperson), Dr. G. Ram Reddy (Co-ordinator) & Dr. Suhasini Arya (Member) tanü (September 28, 2021) Dimapur tonga arua Dimapur Government College ajanga agizükba liasü. Dimapur Government College ya NAAC assessment cycle tanabuba tenzüksü renema lir.

AH&VS ajanga World Rabies Day mungogo

Dimapur, Rongjui/Sept. 28 (TYO): Alima ajunga den külemi September 28, 2021 nü Department of Animal Husbandry & Veterinary Services, Nagaland ajanga 'RABIES: FACTS NOT FEAR' omen nung ajemdaker 'World Rabies Day' munga liasü.

Alima tesem ajungalen COVID-19 tashidak wara ajanga nüburtemi vaccination mashi leni angateter aser tamang makateter, aser linük aika nung COVID-19 mozü agitsü arendaka bilemer aser nisung aikati iba mozü ya agitsü tsübur.

Department ajanga ashiba agi, rabies ya tang tasen masü aser iba tashidak tsübuabulenba, mashi angatetba, osang meshidak

prokshiba ya küm noklang aika tejaklen nungi ajurua arur. Iba yongji taküm omen ya rabies indang osang shidak lemsateptsü aser osang tiazi nung amanger olulu meporokshitsu nung ranglok, ta ashi.

District sasep nunga Department of Animal Husbandry & Veterinary Services puri World Rabies Day nung awareness sentong ayongzükba agia liasü. Rabies yagi nisung dak timtem agütsüba shilem 99 lir saka shilem 100 nokdangtetba tashidak ka lir, aser kiset shiruru meimer nem anti-rabies vaccine angati agütsür.

Iba anogo azü 2024 nem Rabies mozü agütsü liasü, ta sangdong ka ajanga ashi.

Biren-i IAS coaching atema Rs 2.8 cr scheme tenzüksü



Manipur CM-i IAS coaching atema Rs 2.8-cr scheme tenzüksü

Imphal, September 28, 2021

(Agencies): Mongulbarnü Manipur Chief Minister N. Biren Singh-i Super IAS 500 tenzüksüba osang metetdaksüogo.

Iba ya Manipur nungi IAS jangrartem atema scholarship programme ka lir. Iba scholarship scheme nung face-to-face IAS coaching atema Rs 2.8 crore lezmükja lir.

Chief Minister's Scholarship Scheme for Civil Services Aspirants kübok iba scheme tenzükogo.

Union Public Service Commission-i ketdangsüa agiba Civil Service Examination, 2020 nung Manipur nungi nisung 6-i takok anguba atema pelar, ta Chief Minister Biren Singh-i ashi.

Super IAS 500 programme ajanga civil service jangrartem kanga ajanzüksü kechiyong parnok sen aika endoka coaching class atema state toktsür maotsü, ta pai ashi.

"Alternative Learning System (ALS), Delhi nungi IAS mentors-i Face-to-face coaching facilities agütsütsü. Parnoki State Academy of Training (SAT), Takyelpat nung class agitsü aser iba nung state sorkari yaritsü" ta Biren Singh-isa ashi.

"Taküm November 8 nungi coaching classes mezüng shilem tenzüksü aser ibaji April 30, 2022 tashi agitsü. Civil services indang preliminary examination nung takok angurtemi June 10 nungi August 14, 2022 tashi mains

crash course aser test series angati agitetsü" ta paisa ashi.

UPSC examination indang coaching class agitsü atema state sorkari permanent complex den hostel yanglutsü sentong lir, ta Biren Singh-isa metetdaksü.

Mongulbarnü Chief Minister's Secretariat nung agiba sentong nung Manipur Education Minister Sorokhaibam Rajen, Chairman, Loktak Development Authority, MLAL. Sushindro, Deputy Chairman, State Planning Board, MLA L. Rameshwor, Commissioner (Higher and Technical Education) M. Harekrishna aser Director, Education, (U) Rangitabali Waikhom nungertem aden.

Bangladeshi lisopur 10,000 shi India nung arua jenokogo

Agartala, September 28, 2021

(Agencies): Chittagong Hill Tracts (CHT) nung Muslim nungertemi ali atsünga agiba ajanga Tripuri nung Bangladesh lisopur 10,000 shi India-i aruogo.

Iba ya Chakma nung telok 6-i ashi aser yashi parnoki Tripura Chief Minister Biplab Kumar Deb nem memorandum ka agütsüogo.

Chakma teloktemi chief minister dang state ajungalen bendangertem arua aliba jangjatsü atema mapa inyaksü ayongzükogo.

Bangladesh kübok CHT nung Muslim nungertemi Tripuri lisopurtem amaker, ta Arunjoy Chakma-i ashi.

2000 küm nungi CHT nungi Tripuri nung Bangladesh lisopur 10,000 shi ka Tripura nung arua jenokogo, ta paisa ashi.

"Muslim nungertemi ali atsünga agiba ajanga anogoshia Tripuri nungertemi pei talidak toktsür ajemer. Bangladesh Tripuri nung 1,572 tashi Dhalai district kübok

tesem balala nung jenoka lir" ta Arunjoy Chakma-isa ashi.

Bangladesh nung Hindu minorities-i tamangba yimsü tsütsü reshikangshi tia ajurur aser iba jagi Tripura dena India nung arua jenoker, ta Chakma-isa metetdaksü.

"November 2020 nung Bangladesh kübok Comilla district nung Hindu nungertem kitem raksatsü aser mi agi rondoktsü. Facebook post ka nung Islam mezügmeshi ta asüba onük nung ajemdaker parnoki iba mapa inyak" ta paisa ashi.

"Taküm March 20 nunga Hefazat-e-Islam lennir Mamunul Haque sülen anidakertemi Hindu nungertem ki 70-80 tashi raksatsü" ta Chakma-isa shisem.

Chakma telok 6 ji- Tripura Miley Joda, Chakma Socio-Cultural Development Society, Tripura Rejija Chakma Gabujje Joda, Chakma Youths Progressive Association, Chakma Socio-Cultural Organisation aser Chakma Development Foundation of India lir.

Governor-i Sela Tunnel project semdang



Itanagar, September 28, 2021

(Agencies): Arunachal Pradesh Governor Brig (Retd) Dr B D Mishra-i Sela Tunnel project semdangdang Border Roads Organisation (BRO) nem tenüngsang agütsüogo.

Iba mapatong renemba sülen Tawang aser tanga tesemtem den all-weather connectivity alitsü.

Deobarnü Governor Dr B D Mishra Tawang-i aodang Sela Tunnel project semdanga liasü.

Arunachal Pradesh nung alirtem iba mapatong ajanga ajanzüksü. Medical emergency kar ajurudang kanga teyari angutsü. Iba ya Azadi Ka Amrit Mahotsav benjungmong nung nübertem nem sempet tulu ka asütsü, ta pai ashi.

Governor Dr B D Mishra-i anogo asemnü atema Tawang semdang.

February 9, 2019 nü Prime Minister Narendra Modi-i iba tunnel yanglutsü atema lung azüngtsü aser April 1 nungi mapa tenzük.

Sela Tunnel project ya Rs 687 crore shi endoka yanglutsü aser kilometer 12.04 shi talang lir. Iba nung tunnel ana- 1,790 metres aser 475 metres lir.

Iba ya yangluba ajanga Assam kübok Tezpur nungi Tawang tashi senzütsü asoshi ghonda ka den teimba ajema akümtsü.

"BRO-i gari lenmang tajungtem agütsüba atema Arunachal Pradesh nungertemi teti bilemtetsü" ta Governor Dr B D Mishra-isa metetdaksü.

Sonowal-i Majuli MLA menden nungi anenogo



Guwahati, September 28, 2021

(Agencies): Assam nungi Rajya Sabha election nung takok anguba sülen anogo ka lir Union ports, shipping, waterways & Ayush minister Sarbananda Sonowal-i Majuli MLA menden toktsüogo.

Assam Legislative Assembly Speaker, Biswajit Daimary tsüngdang Sonowal-i Majuli Assembly constituency MLA menden yutsüba shidi agütsü.

"September 28, 2021 nungi ni Assembly menden toktsür"

ta Sonowal-i shidi zülü. Iba ajanga Assam nung Majuli Assembly constituency menden tazüng kümogo.

Taoba mapang Assam nung Assembly menden 5 tazüng liasü.

Mongulbarnü Election Commission of India (ECI)-i state balala nung Assembly menden 30 atema election agitsüba anogotem metetdaksüogo.

October 30, 2021 nü Assembly by-election agitsü ta ECI-i ashi.

Assam nung 28-

Gossaigaon, 41-Bhabanipur, 58-Tamulpur, 101-Mariani aser 107-Thowra constituency tem nung by-election agitsü.

Hombarnü Union minister Sonowal den tetokteper shinga melii Rajya Sabha by-election nung pai takok angu.

Sonowal-i Assam Assembly Secretariat nungi takok anguba certificate agizüka liasü aser iba mapang Assam chief minister Himanta Biswa Sarma, State BJP president Bhabesh Kalita aser water resources minister Pijush Haarika nungertem liasü.

GOVERNMENT OF NAGALAND DIRECTORATE OF TOURISM NAGALAND: KOHIMA NOTIFICATION

Dated Kohima the 28th Sept' 2021
NO.TOUR- F & F -40/2019-20/: This is to inform all Tribal Hohos/ Organisation that there will be a Coordination Meeting on 1st October 2021 (Friday) at 11.00 AM in the Conference Hall of the Directorate of Tourism Kohima: Nagaland to deliberate on the Upcoming 22nd Edition of Hornbill Festival 2021. In this regard 2 (two) representatives/members from each Tribal Hoho are requested to attend the aforementioned meeting positively and to treat the matter as important and urgent.

Sd/-

(AJANUO BELHO)
Director, Tourism



TIR YIMYIM YIMOBILEM (EDITORIAL)

DIMAPUR RASEMNÜ, RONGJUI (SEPTEMBER) 29, 2021

Ochi agi kin ka ajungketer

Yimten nung yimsüsür aser ketdangsertemi mapa ajak nung ochishia indangindanga inyak nungbo, tanü putu nung asen lima ama nungbo nisung shia talidak makaba timtem malitsü aser mapa manguba tebilemstü masü saka nübo peria maliba agi mapa meinyakmaba tebilemstüang alitsü. Aji oda, Rural Development nungi yimtaklirtem nem kiojen yanglutsü teyari agütsür aser Urban Development nungi ki makartem nem ki yanglutsür aser mapa makartem asoshi shishilembadak tesem aser kiojen yangluja mapa inyaktsü lenmang lapoktsür. Aji oda, Nagaland nunga Kohima aser Dimapur nungbo Urban Development department-i ki makartem asoshi ki yanglutsüba aser nübortem shishilembada mapa tenzüka inyakdaksütsü asoshi shishilembadak ki tulu yanglutsüba osang angazüker. Item rongnungji, Dimapur nung Forest colony nung Nagaland government-i India government nungi Urban Development Ministry teyari agia yangluba shishilembadak " Shopping Complex" tuluka yanglua aliba ya ka asütsü. Tang tasen tentetba yimten telok " Rising People's Party" (RPP) purtemi ashiba agi, iba ki ya küm ishika jakdang sen crore 43 endoka yangluba ki ka lir. Iba ki ya Forest department li nung Planning department-i Urban Ministry aser HUDCO teyari ajanga yanglu, anungji ki kibur metettsüba tebenja ka lir. Ajisüaka, tang RPP purtemi RTI ajanga bushisüngdangba ajanga metetba agi, iba ki ya Forest department ki lir ta jangjatsüogo. Atangji, ya shir ki ta asüba tongtibangba masü saka ki ya kechi nükjidong nung kechi atema yanglu ta asübajiang kanga tongtibangba lir. Aji oda, " Shopping Complex" yanglu süra, nükjidongji tangatet dang lir. Iba kiji shishilembadak ki, anungji Naga nunger noklang ishika iba tesem nungji dokan tapu balala lapoka shishilembada mapa inyakdaksütsü nükjidong nung, iba ki ya asütsü lemtet asütsü. Tajung kaji, Nagaland nungbo government-i yangluba kiojen aika merenmet toktsür saka iba Shopping Complex yabo renemogo. Ajisüaka, ano tamajung kaji, ki jungjunga renemer mamshitet shibanga ayuba ya asütsü. RPP teloki ashiba ya shitak süra, iba ki ya nija (private) kari agitsü meranger makokba agi, tang tashi kibur mali ama mamshii dang ayur. Nagaland nunga government sentongbo tajung dang atonger, saka sentongji mapa küma inyakdi asüdang, Naga nunger, talisa lanurtem, ajangzükdaksütsü bilemstü melen aiben asenoki asenok ajangzüksü asoshi dang bilemer. Iba jagi mapa aika metenzükter aser tenzükyonga, tatishitsü agi Dimapur nung putu ka state stadium merenmetetba otsü ama, mapa aika merenmetet ser nübortem akoksar. Ashiko, mapa merenmetetbaji ketdangser aser inyakertem asoshibo tajangzük angutsüba lenmangang ka asütsü akok, saka nübortem asoshi inyakba mapa merenmetet aser renemyonga tang amaji nübortem nem magütsü ser shibanga ayuba agi, Naga nunger kibong aika jangratema pei taküm aser kibong agi nümadangdangteta alitsü melen, kibong aika pei boka mesüngtet, tanurtema kaketrejui meyoktet aser sensakba agi lokti aser arogo nunga shilem junga magitet ta kar melemdang, kar apuba agi, kibong aika temeimsü tia nung lir. Iba jagi kibong aika nung tanurtem tajung kümnüseta mekümtet kar auer ashir, kar mozümora achir aser kar pei mang yoka jajar ta Nagaland nung tajunger dangbo tamajunger teimba küma odagi. Asenoki asen dang kara aser junga lira ojang ta bilemer, ajisüaka tangar maka ser asen kija akaba, tangarbo tebok masüng saka asenbo techizüker, tangar talidak maka saka asenbo lir melima, tangar teinyaktsü maka saka asenbo inyaker meinyakma ta asüba tensa, taküm aser kibongji kanga lendongbang nung lir ta metettsüla. Iba tia nung anümeraa pua asen kidangi auer atutsü, yimdong nung ajaki ngua juli rakzüka bener aotsü aser sen tera auyatsü mechi tepseta toktsütsü, kechiyong parnok chiyongtsü maka aser talidaka maka, anungji timtem marem yamaji nisungi inyaktsü. Tangar kibong timtemba agi asen dakbo mekongshitsü amai bilemer, saka sensak marem jala ka pei mang yoka jajaba ajanga asen kinungertem dakang tashidak tamajung menatsü akok. Alima meimchirtem ya kibong ka nung alir amai dang, asen jangratema alidang mapa tajung inyakba agi karbosa ajangzüksü aser ano timtem marem aseni mapa tamajung inyakba agi, tangarbo asen dang nungi timtatema atemtsü akok. Item tia tenzükdakji kodang reprangdangdir, tedongzüng nung kari ochimashi aser meindang inyakba agi, tom aser talaklen nisung aika timtem marem nisung tamajung kümdaksüba angutsü. Iba jagi asen kin ajungkettsü melen taluang alur. Iba tai ya shiba dak kaotsü ?

OLEMSABANG

Kü Meyongnem! Kü Temeden! Elizabeth Cady Stanton nungi Tangazüksü kar

~ Bendanglemla Longkümer

(Yashi adok nungi...)

Elizabeth Cady Stanton aser la den shisa ajemertemi tarutsü America lima nung dang masü saka alima tesem aika nung lai tsükloktsüba milen tanü tetsür temeden meyongnem ayonger ibaji meremsepi la mangdang atalokdakja tetsür jenjang yanglushia, ajungketa aser melenshia odagi. Stanton la akümüli nung meyongnem magütsütetaka lai tarutsü putu atema tetsüria pei meyongnem agütsütsüba (exercise) "La meyongnem, la temeden" ta ayongzükba mangdang ataloktetba yong tetsür tia aser jenjang ajungketa, tanübo America nung tetsür Tatong Tir Kamala Harris mena lir. Iba dak alaka ano Hillary Clinton 2016 küm mezüng tetsür Tir menden atema electoral votes angu. La jakdang 1872 küm Victoria Woodhullia Tir menden atema election nung shilem agiba ajanga yimdenren nung Tetsür Temeden Takotsüng (Women Suffrage Movement) tenzüka nung sendaktepa lir. Ano küm aika sülen United Nations General Assembly, 1948 nung kintem telungjem nung "The Universal Declaration of Human Rights, Article 21" nung tongtibang telemtetba agiba kaji yamai lir: Nisung shiaji pei linük government yangluba nung shilem agitsü tim lir. Public service ajak nung kasa shilem atatsü tim, aser government tamendakdakji nüburtemi mulungbaji asütsü, iba temulungtetbaji nüburtem ajaki shilem agia, miima meyongnem (secret ballot) pei meyong magütsüba ya asütsü. Meyongnem agütsütsüba linük ajak nung fundamental human right aser aji alima ajak nung amshitsü tim ta sayur.

Tanü Naga nunger tensa den medemdanger

'Kü Meyongnem, Kü Temeden!' ya ajaki angateta liaka, tanü Naga lima nung tetsüri election nung shilem magiteter. Kuli kar:

- Senso nung tetsür metendaktsür;
- Tetsür nem yimsüsüba menden agüja maru aser yimsüsüba mendenbo tetsür nem magütsütsü ta angatetba;
- Meyongnem tashiyim amshia agüjadokba;
- Tetsür yimden yimli indang yanglushitsü jembitsü sabang magütsür;
- Yimtsüng yimsüsüba nung shilem magütsür;
- Ao senden nung tetsür metendaktsüba.

Item ajak yagi tetsür meyongnem temetet samadaksür. Tanü tetsür meyongnem temeten aser yimden yangerba nung tebilemstü kar:

- Tetsüri yimden nung shilem magitetsü/magitsüla ta pei sasa ila bilemba mulungsentsü - tetsürtemi iba mulungsentsü koktettsüla.
- Tebur shirnoki akhidang nungi tetsür nem yimden yimli tashi agüja aru aser aji memelenshili ta asüba - nüburtemi ibai tai ta shitettsüla.
- Tetsür jenjang tilaba ta Lai tai tesayuba aser sayutsüngiba - Ao lima nung traditionalist sayutsüngir aika lir aser itemji aitsütsüla. Laishibai kechi ashir iba dangi meyiptsüla.
- Tetsü-tebou tangatetba ammeter tetsür yimden nung shilem maka ta democratic rights anema nokdangba - iba tangatetba ya tai aser anentsüla. Tetsürtemi election nung shilem agitsü jangratsüla aser ajungshitsüla.

Ano ya metetdi: Pei meyongnem magütsüba aikati nemjema mebilemer.

Kecha masüar! Tangar ka tulur akümtsü nung kechi ta bilema meyongnem agütsü maoba. Ano tamanger kati election nung shilem agibaji temenen, anungji iba nungi pilaa alitsüla ta tai tangatetba agi asen nüburtem yimdenren nung tongtibang shilem ka magir ta angatettsüla. Elizabeth Stanton aser ano aikati iba temeden atema pei taküm, azü tenlaa noktakba ajanga tanü nüburtemi meyongnem agütsütsü yimli mungutet. Asen limabo democracy lima asü nung tetenzük nungi ibala tenokdangba mali asü, yimlijji odang lir sür nung polling boothi oagi shilem agitsüba mejangraba aser mebilemba ajanga tangariang nü/kü meyongnemji agüjadoker. Iba dakji alaka tanü pei temeden meyongnem yoka chiadokba yimya tamajung ka tenteta lir. Yimden yangerba nung pei meyongnem senti aser ibai sen yong yoka machitsüla. Sen yong ne meyongnem yokra nai pei lima ayoker, memeimer ta angatetdi. Aben jagi asen lima ochiba yimdong nung laodakja lir! Sen yong pei temeden meyongnem yoka chiadokba ajanga tarutsü tia, nükla yanglutsü asen ket nung tashi makai, ochiba ola madokteti akümer. Ochi agi mesüi tashiyim agi lenisüba menden nung amenertem matsüngdang asen lima yanglutsü (develop), renloktsü atema arok shilem asütsü tebang mekashiteti kümer. Tatishitsü agi, tzükong kar nungbo lenmang mali, arogoiang tenla sarua lenmang yanglur, saka nüburtemi ochi ola madokteter. Kechiba? "Ne Meyongnem, Ne Temeten!" sen yong ayokba ajanga lir. Tanü asen nüburtem, joko pei sasa pei matsüngdanga sünga ochi meshiteti kümogo, anungji alima melenshitsü bilemra, "Clean Election" atema süoki yia bilemra, pei dak tamasa ochibaji amenloktsüla, aji ta sürapang nüburtemia/alimai ne dak temulung alemtsü. Rongsen yong masü saka ochi aser tindang mulungsentsü agi asen taküm melenshir külen asen kinunger aser kiyongera iba shisatsü jagi ayongzüksüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Bethlehem nung Tenla ki yanglushitsü atema tenla agütsüteper



Church of Nativity

September 28, 2021: Akhidang West Bank nung aliba Tenla ki ka yanglushitsü atema America nung Khristantemi tenla agütsüdar; Tenla ki yanglua aliba tesemji Yisu Khrista asoba tesem lir ta amanger aser mapang ka nungbo iba tesemji United Nations list for world heritage sites rongnung densema liasü.

Bethlehem nung Church of the Nativity Tenla ki ya temeshi lima- Israel semdanga temeshi aini aoertem atema nungtugu tourist tesem ka lir aser 2012 kum iba ya United Nations Educational, Scientific and Cultural Organization (UNESCO) World Heritage Site shima liasü.

Church of the Nativity Tenla ki ya 565 kum renema liasü aser 1480 kum iba Tenla ki yanglushiba sülenbo khen danga junga meyaglushi aser tangbo iba Tenla ki chireptsüsa jenjang ka nung lir. Tawa iba Tenla kidang tsungbang, jara aser kishi aika yanglushiogo aser ibaji alima tesem balala nungi Khristantemi tenla agütsüba ajanga yanglushiba liasü.

Bethlehem Development Foundation Managing Director aser CEO, Mazen Karam-i sangdong ka ajanga, "Church of the Nativity ya putiotsü aser

tamangba yimsü tsütsü senti senmang ka lir. Iba senti senmang ya tanaben alima nem agütsütsü atema onoki kanga meranga inyakdar," ta metetdaksü.

Bethlehem Development Foundation (BDF)-i 2018 kum melungtet telok- American Friends of the Bethlehem Foundation (AFBDF) tenteta liasü aser parnok longjemer tesüiba kum 8 tsungda dollar sen million 30 shi bendentetogo aser iba senji amshia Tenla ki yanglushir. Tenla timbaka America nung Khristantemi agütsüba liasü.

"United States nung Khristantemi temeshi yimti- Bethlehem kanga meimer. America nung medemertemi onok nungitba aser Church of the Nativity yanglushitsü atema melungsoa tenla agütsüba atema onok kanga pelar," ta AFBDF Tir, George Salem-i metetdaksü.

BDF aser AFBDF nati maneni Tenla ki yanglushiba project inyaksü, aser iba project kubok atem nung lung aser marble alemtsü, Tenla kima tiles inoktsü aser mi lendong aser tanga lendong balala nungi Tenla ki kumzüksü atema microclimatic systems inoktsü.

BDF board of trustees nung Chairman, Samer

Khoury-i, "Onoki Nativity Church tanaben yanglushitsü nukjidong yur inyaker. Iba dak alia Bethlehem nung nüburttem atema project balala tenzüksü aser iba yimti nung alirtem atema yimjung, temeim aser tepela alitsü atema inyaksü," ta metetdaksü.

Yaküm coronavirus wara kanga prokba mapang Church of the Nativity mapang talangka shibanga liasü saka May ita tatembanglen tanaben lapok.

Coronavirus wara aliba den külemi ainlen senzüba nokdangba ajanga tourism tsütsü takoksa kanga ngua liasü. Ano yaküm Christmas mongpu nungbo bendanger raliwalir shingaia Bethlehem mesemdang. Kum shia raliwalir million 1 dak temai Bethlehem semdang saka yakumbo wara aliba ajanga raliwalirtemi mesemdang.

Church of Nativity ya 330s mapang mezüing asü aser 339 A.D nung semzuka liasü. Iba sülen kum 200 shi lir Samaritan revolts mapang mi agi tera raksatsü aser Byzantine Emperor Justinian-i tanaben yanglushia liasü.

Iba site nungsa Latin, Greek Orthodox, Franciscan aser Armenian convents aser Tenla kitem lir aser temeshi ainlen jajartem atema lenmang ka lir.

Arogoi kiralongra aser temesepba mozü anema campaign tenzüksü

New Delhi, September 28 (Agencies): Catholic Bishops' Conference of India (CBCI)-i kiralongra aser temesepba mozütem anema October 1, 2021 nü awareness campaign ka tenzüksü.

Save the People campaign nungji kaketsirtem, lanurtem, Arogotem aser lokti tentet balalai shilem agitsü; iba campaign ya ita asem tashi agitsü, ta tan hopta CBCI Laity Council secretary, V.C. Sebastian-i sangdong ka ajanga metetdaksü.

Iba campaign kubok kiralongra aser temesepba

mozütem anema social media ajanga awareness agütsütsü, seminar agitsü, kibongtem semdangtsü aser local solidarity groups tenzüksü, ta kasa sangdong ajangsa metetdaksü.

Sebastian-i ashiba agi, iba campaign agiba ajanga nüburttemi kiralongra aser temesepba mozü ajanga teraksatsüba tali jangjatsü.

Yimtenren party kari kiralongra dak sendakba tangatetba higher education sector nung benokba ya shisabulutsü onük ka lir, ta paisa ashi.

India Catholic Arogo nung

tongti telemtetba agiba telokji CBCI lir. CBCI indang laity council region 14, Catholic Arogo 174 den tanga Arogotem aser lokti tentet balalai iba campaign nung shilem agitsü. Iba dak alia denomination balala, lokti lenirtem aser loktiliba-sobaliba lenirtemi shilem agitsü.

Sebastian-i ashiba agi, Youth Action project nungji lanurtem aser shisaliok rejutemi kiralongra tangatetbatem anema nokdaksü. Parnokisa kiralongra aser temesepba mozütem anema tenangzükba agitsü.

ANO GO ABEN TSÜNGREM DEN

MERÜKTETDAKTSÜBA MI

Sama-a aotsü saka, koba hon mi agi atidanger, ibala hon dang nungi sentiba koba nenok tamang lir, iba tamang atidangba Yisu Khrista jungkai adokdang, tenüngsang aser sentsüwangshi aser tetushi ngutettsü, aji asoshi tenüngdaksü yari, tang khenpika tatidang tapu aika nung shisa amaska, nenoki nenok tekümtet nung kanga pelar. 1 peter 1: 6-7

Asen takü nung Tsüngremji teti mapa nung lir. Timtem mapang nunga Pau langka tajung inyakner. Naia iba indang kechi ashir? Tsüngrem O jagi ashir, mapa tasak ajurudang asenoki pelatsüla. Iba tetezü mapang tasak timtem asoshi pelatsüla ta masü. Saka ibala mapa ajanga asenok Kibubai indaktsür ta meteta Pa dangi anasa aodang, Kibuba nugi tepela tesünep asenok dangi arur.

Timtem mapang tasak ajurudang shisabulu, tejashi mesüra mulungzürepba nungji masü mapa tasak telung nungji kechi lir ta asüngdangba nung tajangzük lir. Yimya agi asenok meimchiri mapa tasak nungi akokba tashi ajentsü meranger, saka Tsüngremiba iba mapa nungji asenok dang taremsük angazükdaksüner. Hon koda mi agi merükteter yamaji asenoka tali temerükba kümdaktsütsü mi ama Pai amshir. Asenoki kodang mapa tasak jagi asenok tabensa kümdaktsür ta metetdir, asen tejangraba tiyongyabaji Tsüngrem mulung nung lir ta meteta asenoki mapa tasakji ajangtsü. Alimaibo apang tasak nung tepela tesünep indangji junga mangatettsü. Saka asenoki timtem mapa ajanga alima melenshidaktsütsü tanelar nokinketer Kibubai asenok kümdaktsür ta metet.

SARASADEM

Kibuba Yisu, Na kü dak lir, anungji ni kecha metsübu mapang tasak ajangtettsü kü nem Ne teimla agüjangma. Amen

Ao kaket tasen ana sayaogo

September 28, 2021: 28th September 2021, Rasemnü anogo Kohima nung Rev. Yashila Jamir, Associate pastor (Women), KABA ajanga Ao Kaket ana sayaogo. Item kaketter ya Yanglushidi Sabang Sensaksem nungi adokba kaket koba Discipleship Bible College aser Programme for Theology and Cultures in Asia (PTCA) longjemer adokba lir. Kaket ana tenüngji:

Tanü Putu Khristan Tamang Lenisüba. Edited by S. Wati & Wati Longchar, PTCA Study Series No. 22. Iba kaket nung ocet (articles) 21 Aoer laishir balalai zülua lir. Keta alibatem kar: Arogo, Temeshi Sabang aser Ainkar: Covid-19-i kechi ashir?; Khristan Tamang, Lokti Yanglushiba aser Laiputi Ratetyim; Tanü Putu den apert Arogo Tenyaba Mapa; Mopung Putu den apert Arogo Tenyaba Mapa; Lenmang Mejungra Rongsen Renloktsü Makok; Yashi, Tanü, aser Asüing Ao Oshi Jenjang; Arogo aser Yimden nung Tetsür Temeden; NBCC & ABAM Clean Election- Inyaka aruba nung Takok aser Tamakok, ano aika lir.

Yanglushidi Arung, YSS Vol. 2. Edited by Mapula Lemtor,

Temsüwati Kichu aser Tiatoshi Longkümer. General editor, Wati Longchar. PTCA Study Series No. 26. Iba kaket nung ocet (articles) 23 Aoer laishir balalai zülubattem lir. Keta alibatem kar: Arogo Tenzükba nung Tebur-Tetsür; Arogo Inyakyim aser Lenisüba; Copastors Inyakyim; Youth Director Tasenba Arogo; Kü Pungmang: Ao Arogo Yimden Yimsütsüba Yanglushitsü Nungdaker; Sen Aputepba Lokti Tebilemstü aser Arogo Tangatetba; Nagaland Liquor Total Prohibition Act (NLTP Act): Takok asü Tamakok?; Khristan Kibong nung Kilir koda Ayutsü; Taküm lidaktsüba Tzü aser Rongsen-Ketsüing Terenlok; Ao Lima Eden Tsüki ama Kümdaktsüdi, ano aika.

Kaket ka jenjang Rs. 250/- lir. Aser taginürtemi item tesem nungi angutsü:

Kohima Area - Mr. Tiatoshi Longkümer - 9856587377
Dimapur Area - Rev. S. Wati - 9612830935

Mokokchung - Rev. Temsüwati Kichu - 7005761441
Tuli Area - Rev. Mapula Lemtor - 9612313753

Impur nung - Mrs. Arenla Longkümer - 7005527600
Outside of Nagaland - Rev. Dr. Wati Longchar - 9874184472

BJP lenirtemi EC den ajurutepe takhangba kar agütsü

New Delhi, Rongjui/September 28 (Agencies): Bhabanipur nung kangadang tongtibang bypoll magi tsüingda BJP lenirtem kari Mongolbarnü Election Commission ajurua, election kecha tetsükdaksü makai sadem sadema agitsü atema jenjang kar benoktsü khangogo. Parnoki ashiba agi Trinamool Congress-i parnok pusemertem anema tashiyim mapa inyaker. Bypoll nung West Bengal Chief Minister Mamata Banerjee-a tokteptsü renema lir.

BJP-i September 30 nü election agiba anogo Section 144 benoktsü aser central forces dena yoktsü mepeshi asüingdang.

EC den ajurutepe lenirtem rongnung Union ministers Bhupender Yadav, Anurag Thakur aser Mukhtar Abbas Naqvi nunger densema liasü.

Yadav-i state nung TMC sorkar aitsü aser ashiba agi, parnoki tashiyim amshir aser parnok anemertem dak rangloker inyaker. Paisa, TMC züingsemtemi BJP lenir Dilip Ghosh amakba tetsü jembü.

EC dangi tezülung nung tahgangba ka agütsüba nung BJP-i, sepaitem patrolling tali senzüdaksütsü aser security forces nem iba tesem amokbangdaksütsü mepeshi.

Parnokisa, Bhabanipur nung booth ajak ayimjemtsü atema central armed police forces company 40 bosa

yoktsü khang liasü.

Local state police mesera home guard tem nem poll duty kecha magütsütsüla, ta lenirtemi ashi.

Commission-isa, iba tesem nung aliba nüburttem aser talisa vote agütsütsüpurtem nem parnok teküzmükba kübok toktsütsü atema aser election ochi nung sadem sadema agitsü asoshi jenjang agiba tem metetdaksüla, kechiyong aji kanga nüngdaka lir, ta BJP-i ashi.

COVID-19 tensa aser election sülen state nung political worker tem amakba ken o benoka BJP-isa, Commission dang booth tem nung political party representative memendaksütsü mepeshi.

Kanhaiya Kumar aser Jignesh Mevani na Congress nung aden

New Delhi, Rongjui/September 28 (Agencies): CPI lenir Kanhaiya Kumar aser Gujarat MLA Jignesh Mevani na Mongolbarnü Delhi nung party lenir Rahul Gandhi matsüingdang Congress party nung denogo.

Kanhaiya Kumar ya taoba mapang Jawaharlal Nehru University tir liasü aser Jignesh Mevani ya Gujarat nungi Dalit lenir ka lir.

Kumar aser Mevani na Congress party nung adenba mapang Rahul Gandhi den Congress general secretary KC Venugopal aser Gujarat Congress working president Hardik Patel nata dena liasü.

Lanur lenir ana party nung adenba sülen Congress headquarters nung osangbenertem

den sensaksemba mapang Venugopal-i, "Kanhaiya Kumar ya linük nung freedom of expression atema raraba temaitsü ka lir. Pai kaketshir lenir ka ama fundamentalism anema raraogo. Iba amala tetangshi lenir densemba ajanga Congress party nung züingoksema alir ajunga ajungmesotsü," ta ashi.

Mevani den kanga junga sendaktepa alirtemi ashiba agi, pa küm ka shi Aam Aadmi Party nung adentsüba densema tanga lenmang aika asadanga aruogo. Pa taoba mapang AAP otongdar liasü. Paisa, tebilemba kasa aliba lanur lenirtem den longjemer inyaksü atema national front kar asadanga liasü, ta ashi.

Navjot Singh Sidhu-i Congress tir mapa toktsü



ni Punjab tarutsü aser Punjab akoksatsüsa inyakba maparen nung kodanga haihaora makatsü. Anungji ni Punjab Pradesh Congress Committee tir mapa toktsür," ta Sidhu-i Gandhi dangi yokba shit nung shia lir.

Ajisüaka pai shiti nung haihaora akaba indang jangja jangja mashi.

Sindhu ya Punjab Congress tir asütsü July 23 nü shim aser tang pai iba mapa toktsüogo. Amarinder Singh den ita aika mangatettep adoka aruba sülen pa nem tir mapa agüja liasü.

Congress yongtsü nung ken o jangja alirtemi ashiba agi, Singh sülen pa nem chief minister mapa magütsüba atema Sidhu mepelar. Osang ajangsa, pai mapa toktsütsü atema telemeteba magi tsüingda Gandhi'er kinungertem den majurutepe.

Maneni Charanjit Singh Channi lenisüba nung taoba minister Rana Gurjit Singh Punjab Cabinet nung züingoksemba atema pa

mepelar. Doaba nungi MLA troki Sidhu dangi Deobarnü Punjab cabinet tasenba tenanzüktepeba magi tsüingda shiti ka zülua, ochi mashi ken o nung aija aliba ajanga Kapurthala MLA Rana Gurjit Singh minister tem list nungi agintsü ashi. Lenirtemisa iba menden ya tarak maketba Dalit lenir ka nem agütsütsü akhang. Iba shiti ya copy ka Channi dangi yokogo, ajisüaka parnoki ashiba magizük aser Rana Gurjit cabinet minister kümdaksü.

Singh aser Sidhu na tsüingda mangatettep ya 2019 küm tenzük aser taküm tali aküm. Taruba küm assembly election matong tsüingda mangatettep aliba anendaksütsü nükjidong nung Congress party lenirtemi Sidhu nem party tir mapa agütsü, saka pai tanü mapa toktsüba ajanga Punjab nung Congress party yongtsü nung mangatettep tanga tango medembangtsü ta jangjaogo.



Rajasthan kübok Jaisalmer nung overbridge lenmang ka yanglutsü atema ongken tua aliba nung arishi küm 20 tain tebur ka arakseta asü. Asanguba tasü mang ya Mongolbar anepdang gari anishirtemi nguteta liasü. Asüsang ya Jaisalmer nung alir Himanshu ta jangjaogo.

India-i Novavax Covid-19 vaccine trial nung tanurtem shilem agidaksütsü temelaba agütsü

New Delhi, Rongjui/September 28 (Agencies): India indang drug regulator-i Mongolbarnü vaccine yangluba company Serum Institute nem Novavax indang Covid-19 vaccine tanur arishi küm 7 nungi 11 tsüingda alirtem dak tendangtsü atema temelaba agütsüogo. Linük nung tanurtem coronavirus tashidak nungi kümzükä toktsütsü atema renemba mapang tang iba temelaba agütsüogo.

India nung nütsüingyongsük billion 1.4 shi aliba nungi nisung taintem nem vaccine dose million 870 dak temabo agüjatokogo.

"Ken o kanga junga asadanga sülen committee-i inyakyim dak ajemdaker vaccine tendangtsü atema tanur arishi küm 7 nungi 11 tsüingda alirtem anioktsü temelaba agütsüogo," ta Central Drugs Standard Control Organization, subject expert panel kati

ashi. Serum Institute-i, Covid-19 vaccine Covovax, arishi küm 12 nungi 17 tsüingda alirtem dak tendang tenzükogo aser tanur 100 dak mozü tendangba sülen safety data ka agütsüogo. Covovax vaccine ya India nung yangluba Novavax indang tapu ka lir.

Novavax vaccine ya Indian health authorities-i tang tashi temelaba magütsü lir. Iba ita tetenzüklen Serum Institute tekolakba Adar Poonawalla-i ashiba agi, Covovax ya arishi küm 18 tekübok pur nem agütsütsü atema taruba küm January mesera February ita temelaba angutsü imlar.

Tang tashi nung mozü yangluba company Zydus Cadila indang DNA Covid-19 vaccine kija jongdak mapang nung nisung tain aser tanur arishi küm 12 temapur nem agütsütsü atema India nung temelaba agüja lir.



Manjara tzünokdang temeket nung tzüinglu kanga sashia aruba sülen tzü chioktsüsa akümba ajanga Maharashtra kübok Beed district aser Latur district nung yimtsü kar tzü agi metsüingogo. Noksa nung yimdaklirtemi bus ka tzü agi metsünger aliba apu ka adena aoba repranga ataba angur.

Japan nung COVID state of emergency agientsü

Tokyo, Rongjui/Sept. 28 (TAgencies): Japan nung COVID-19 tashidak wara ajema akumba ajanga rongsenketzung asendenshitsu nukjidong nung tan hopta coronavirus state of emergency agientsü sentong lir, koba ita trok dak tema nung tang mezüngbuba alitsü.

COVID-19 cases maneni ajema akumba ajanga region ajunga nung coronavirus emergency agientsü sorkari telemtetba agiogo, ta Japan Ato Kilonser Yoshihide Suga-i Mongulbarnü ashi.

Japan nung tang aliba state of emergency ya April ita sangdong aser aiben atsülangshia aser ulushia arua taoba küm tashidak wara tenzükba sülen talangtiba akum. Ita tatemi iba emergency tembangba sülen tesen kuma meyanglushitsu.

"Emergency agienba tetetzü asenok noklang shilem sadoksayima alitsü ashir masü. Talenbatem tanem tanemi salatsü, ta sorkari nüburtem dang jangja-jangja ashitsüla," ta sorkar atema medical adviser Shigeru Omi-i

osangbener dang ashi. Tenokdangba nungya restaurants aser bar mapang tatsüba lapoktsü aser yi magütsütsü dena lir. Japan nung COVID-19 tashidak nisung million 1.69 shi dak puteta nisung 17,500 süaka danga linük nung amabo tenokdangba tesashi magütsü.

Sorkar ya melenshiba mapang ka lir, kechiaser tang yimsü tesüdak party-i küm tatemlen Suga melentsü nübu bushir. Suga'er sorkari virus nokdangtsü asoshi maparen balala inyakba nung nüburtemi temolung masü lia aruba aser nüburtemi anema nokdakaka tashidak wara prokshiba tialong nung Olympics ayongzükba ajanga aitsüba sülen pai party lenir aser ato kilonser menden nungi alutsü telemtetba agi.

Ita ana tsünga parliametary elections agitsü lia iba virus azüoktsü atema sentong tajung yanglutsü ajungshir.

Economy and Fiscal Minister Yasutoshi Nishimura, shiba COVID-19 ketdangsuba nunga in-charge lir, pai chiajema tesemtem aser danga

commercial establishment tem tanem-tanemi akhi ama lapokyonga aotsü, ta ashi, saka mongpu aruba ajanga nüburtem timba kilung nung alitsü aser tashidak ya tali poktettsü, ta tebilemstü lir.

Sorkari mera tasen kar agitsü renemshiba mapang lir, aser yangji vaccine passport aser virus tendangba dena lir.

Japan nung anogoshi COVID-19 tashidak putetba ya 2,000 shi lir, koba August ita tiyonglen putetba shilem ter kuma lemsar shilem ka dang tajemba lir.

Vaccination renlokba aser nüburtemi social distancing yimya tali amshiba ajanga iba tashidak ajema akumer, ta mongintemi ashir. Japan nung nütsüing yongsük shilem 56 shi mozü course tembanga agiogo.

Japan nung medical nung inyaker nem küm tatemlen nungi vaccine booster tasembuba agütsü tenzüktsü sentong lir aser taruba küm tetenzüklen teintet rogotem nem agütsütsü renemshiba mapang lir, ta Vaccinations minister Taro Kono-i tawa shia liasü.

Haiti election kodang agitsüar memeteti thinenogo

Port-au-Prince, Rongjui/Sept. 28 (Agencies): Haiti indang elections aser constitution melenshitsu sentong ita ishika tsünga agitsü liasü, saka electoral administration anentsüba sülen iba sentong agitsü mapang meshiteti atsülangogo aser linük ano maneni tamajungba jenjangi yoker.

Ato Kilonser Ariel Henry, shiba asür Tir Jovenel Moise tepsettsü anogo ana lia shimtet, pai Hombarnü ozüing ka sangdongba nung Provisional Electoral Council (CEP) züingsemtem anentsü.

Pai council tasen shimtsü atema renemshir, ta angazüker saka iba atema anogo lateta mali.

CEP ajanga electoral calendar aika yangluba sülen tir aser legislative elections aser constitutional referendum ya November 7 nü agitsü lemteta liasü.

Voting tanabuba round ya January 23, 2022 nung municipal aser local elections den külemi agitsü lemtet.

July ita tepsetsang Moise-i 2020 küm September ita shimtetba sülen züingsem tuko agi akumba CEP ya opposition aser nüburtemi kanga sashia aika liasü.

Moise, shiba par kidang khaset, pa ya 2019 legislative elections thinenba sülen ozüing ka kübok yimsü süa arua liasü aser pa indang kümsük ya Feb-

ruary 2021 asü 2022 nung tembangtsü, ta mangatetep adok.

Makamait, telok balala tsünga azüdokshi aser COVID-19 agi timtema alidak pa tepsetba ajanga iba linük anokshitsu.

Ano August ita Haiti nung menoknok magnitude 7.2 anoka iba asetkong linük jenjang tamajungbai yok. Coronavirus tashidak wara mechi elections aser referendum ya anaben tashi thiner liasü.

2020 küm January ita nungi Haiti parliament züingsemtem ola madokteter aser senator 30 aliba nungi 10 dang tang tashi office nung lir aser parnok kümsük ya 2023 küm January ita tembangtsü.

Haiti nung humanitarian aser security tsütsü timtem tulu ajurua aliba mapang electoral agenda maliba ajanga yimtenren tashi meiti kindaktsü.

Chief public prosecutor kati Moise tepsetba nung Henry sendaktepa lir ta tai tongloktsüba ajanga iba nisungba ya pai mapa nungi anentsü aser linük mejangjaba tia kati yok.

Iba sülen Henry-i justice minister melena liasü.

Iba tensa ya ajanga Haiti nung Council of Ministers indang secretary-general mapa nungi anena liasü.

Greece-i France ket nungi raradang amshiba rong alitsü nangzüktep

Paris, Rongjui/September 28 (Agencies): France ket nungi warships asem alitsü atema Paris aser Athens na Mongolbarnü multibillion-euro tenangzüktepba ka nung sign süogo. Tir Emmanuel Macron-i ashiba agi, iba ajanga EU indang defence tashi taitba akümtsü.

Hopta ana tejakdang Australia-i France nung yangluba submarine alitsü tenangzüktepba yangluba thitsüba sülen tang Belharra frigates alizüktsü atema tenangzüktepba ka yangluogo.

Elysee Palace nung Greek Ato Kilonser Macron den sendena ka amenba sülen Macron-i, Mediterranean nung linük ana tejangraba kümzuka ayutsü atema tesendaktep tali tajungba küma yanglushiba nung shilem ka ama Greece-i France ket nungi frigates asem

alitsü, ta ashi. Paisa, Athens'-i Belharra rongtem alitsü atema telemtetba agiba ajanga France defence industry dak tamang akaba sayur, ta ashi.

Australia den submarine atema multibillion-euro contract yanglur aliba thitsüba sülen iba tenangzüktepba yangluba ajanga Paris-i osang tejangja ka yokogo. US nungi nuclear-powered sub tem alitsü ta shia Australia-i tenangzüktepba yanglur aliba thitsü.

Maneni France lenirisa United States dak dang metaloker melei Europe nung defence capabilities develop asütsüla ta ashiba den NATO tasü kümdar ta ashi.

"Tanü ya Greece aser France na atema otsütsütsü anogo ka lir. Onoki bilateral defensive cooperation

ajungkettsü telemtetba agiogo," ta Mitsotakis-i ashi.

Paisa, tenangzüktepba kübok kati ka tangatetep nung yariteptsü aser jenjang ajak nung longjemer inyaktsü aser ano frigate pezübuba alitsü atemaa lenmang sadema lapoka yuogo, ta ashi.

Rong sen kwi agi alizüktsü iba idang osang tejangja mali, ajisüaka rongtem 2024 küm nungi agütsü tenzüktsü.

Australia nungeri submarine alitsü atema nangzükteper aliba thitsüba sülen EU aser Washington na tsünga tensa mejungi kümer liaka Greece aser Washington na tsünga defence dak sendakba nung mapang talangka tesendaktepba nung aruba atsülangshitsu atema jembishinüa aliba nung mekongshitsu, ta Mitsotakis-i shisem.



Phitsanulok province, Thailand nung lenmang ka tzü agi metsüngbanger aliba noksa nung angur. Linük north aser central province tem nung tzümetsüng adoka nisung trok takum samaba sülen Thailand yimtiba, Bangkok tzümetsüng nungi kumzüktsü ariteper. Bangkok nungi north tsütsü kilometer 60 shi pilar Ayutthaya nung akhi chuba temi yangluba ki-ojen kumzüktsü atema sepaitemi Mongulbarnü tenokdangba balala yoka liasü.

US tir Ronald Reagan dak akhasang chioktsü

Washington, Rongjui/September 28 (Agencies): US nung Obendanger kati Hombarnü ashiba agi, pai 1981 küm US tir Ronald Reagan aser tangar asem yirutsüsang John Hinckley kecha tenokdangba makai chioktsü.

"Küm aika sülen ni Hinckley kecha tenokdangba makai chioktsü," ta US District Judge Paul Friedman-i, Columbia district nung okadak ken o angadanga mapang ashi.

2016 küm Friedman-i, Washington psychiatric hospital toktsür aotsü asoshi Hinckley nem temelaba agütsü, kong pa küm semer dak tema liasü, ajisüaka pa senzüsenpong aser internet amshitsu atema tenokdangba agütsür liasü.

Hombarnü ken o angadanga mapang Friedman-i, pai tanungba tenokdangbatem agintsütsü sentong lir ta ashi. Hinckley indang mental health tebilemstü tajungba kümogo aser pai joko timtem magütsütsü, ta Friedman-i ashi.

Friedman-isa, pai telemtetba agiba jangjatsütsü

atema iba hopta tezüluba nung tetuyuba ka agütsütsü ta ashi.

Kasa mapang nung federal prosecutor, Kacie Weston-i, ken o angadanga mapang US Justice Department-i Hinckley tenokdangba kecha maki chioktsü mulung agizük, ta ashi. Ajisüaka tenokdangba ya 2022 küm June ita matong tashibo magintsüla ta ashi, ajita asünungdang prosecutor temi tetsü asüba sülen pa kija alitsü asoshi tenzükba mapang asadanga lietettsü.

Reagan tepsettsü merangba mapang tepokpok yiru saka yakta taneptsü angu.

Iba lendong nung White House press secretary James Brady, Secret Service agent Timothy McCarthy aser Washington police officer Thomas Delahanty nungera yirua liasü.

1982 küm ken o angadanga mapang Hinckley aibelena mali ta ngutet kechiyong pa tekelok meshidak liasü.

Iba tatalokba ajanga modern gun control movement amenoktsü atema teyari agütsü. Brady aser pa kinungtsü Sarah nati Brady Campaign to Prevent Gun Violence tenzuka liasü.

LANGPANGKONG TZÜKONG MUNG DANG

43 BUBA LOKTI SENDEN

Tesentepdak : Chuchuyimlang

Anogo : October 1, 2021



Omen:

"Yimkong Süpen Mera Ka"

KETDANGPURTEM

1. Tir : Wb. M. Zulu Ozüküm
2. Tatong Tir : Wb. S. Temsu Pongen
3. Tongti Zülur : Wb. Lanu Pongen
4. Repsem Zülur : Wb. Watitoshi
5. Sen Zülur : Wb. Moarenba
6. Senyur : Wb. Süpongmatong

MUNG DANG SENDEN SENTONG

Mapang: Anepdang 11:00 Ako

Menden: Ketdangpurtem

1. Lai zünga sarasademtsü : Wb. T. Lima Pastor, Chuchuyimlang Baptist Arogo.
2. Tir Ola : Wb. M. Zulu Ozüküm.
3. Mungdang Pelaa agizükba : Wb. Tsükjemtangit, Secretary, Chuchuyimlang Village Council.
4. Sü Medem O
 - 1) Wb. A. Pangjung Jamir, Tir Kohima Langpangkong Senso Telongjem (KLST)
 - 2) Wb. S.N. Meren, Tir Dimapur Langpangkong Senso Telongjem (DLST)
5. Onük
 - Tejembir : Yimkong Süpen Mera Ka
 6. Sobaliba ken ka : Wb. Suponenba Longkumer, Director, CEC, Dimapur
 7. Tajungshi O : Riongsanger Putu Tatar, Chuchuyimlang.
 - 1) Wb. Amenba Yaden, Hon'ble MLA, Govt. of Nagaland
 - 2) Wb. Imnatiba, Hon'ble Advisor, Industries & Commerce, Labour & Employment, Skill Development & Entrepreneurship, Govt. of Nagaland
 8. Tayongzükba O : Wb. Tongpang Ozüküm
Hon'ble Minister, (PWD) Housing & Mechanical, Govt. of Nagaland
 9. Osangtem agitsü
 - a) Tongti Zülur Osang
 - b) Bentet Luden Osang
 - c) Temzüng/ Pangzüng Luden Osang
 - d) Nungtet Luden Osang
 - e) Langpangkong Kaketshir Mungdang Osang
 - f) LTM Road Co-ordination Committee
 - g) Tuli DC Upgradation Committee
 - h) Tuli SDHO Committee Osang
 10. O Lemtep Mapang
 11. Ketdangpur tasen metetpela: Convenor, Nungtet Luden
 12. Mepelzüng O : a) Convenor, Local Planning Committee, Chuchuyimlang
b) Convenor, LTM Planning Committee

TEMETETTSÜ O

1. 43 Buba Langpangkong Tzükong Mungdang asoshi Chuchuyimlang Riongsanger Putu ajanga nübo 300 pelashishia jaoker.
2. Yimtsüng aser Jila balala Loknutem nungi nübo pongu (5 persons each) arua iba mungdang nung adentsü. Iba den külemi kilen saru senpak tenem (Rs.50) bener arutsü metetdaksür.
3. Langpangkong Tzükong Mungdang asoshi tebilemba (agenda) lira, September 28, 2021 anogo tashi nung Pangzüng Luden (Resolution) tayonger Wb.Tally Lkr dangi Whatsapp Number +91 9612046848 nung yoktsü metetdaksür.
4. Chuchuyimlang Riongsanger Putu-i, mapang apir 43 Buba LTM Inti Mungdang ajak chiyongdaksütsü.
5. Timser: Chuchuyimlang Kaketshir Telongjem (CKT).
6. LTM aser Chuchuyimlang asoshi tenla tajung bener arutsü mepishir.
7. Mapang amshiyim : i) Sü Medem O (7 minutes)
ii) Tajungshi. Tayongzükba O (10 minutes)
iii) Onük Jembir (15 minutes)
8. Iba sentong takok angutsü ajaki sarasadema atatsü ayongzüker.

Sd/-

43 Buba LTM Planning Committee Chuchuyimlang

MULUNG NEN O

June 6, 1926 - September 25, 2021

Onoki teti meima aliba asür Obala Mapulengjung, mapang tatsüka temang manemi alidang aser pa akümüli wadang tembangba tashi kija, kibong, sosem dangsemer, kiyongkidanger, medem sor aser lokti tenteter balala shirnokisa tamang sarasadem, nübu aser rongsen agi ozü den nungita yaritepogo, nenok ajak dang kangasa pelaba lemsateper.



Ozü yarir ajak dang kangasa pelar. Tulusang Tsüngremi nenok ajak talubosa moajang ta ozü tamang sarasadem.

-Temeim Chirnur, Semchisemnur,
anükapang aser Kinungertem

Pelaba Lemsateper

Tasoba Küm: 1956 - Tasüba Anogo: 10/09/2021

Onoki teti meima aliba asür Mrs. Imtisenla, Molungkimong shirangba mapang nungi tenzüka ozü asükhü mapang tashi nung kija, kibong, kiyonger, Arogo, Yimten, bendang balala nung alirtem aser lokti balala shirnokisa nübo, sarasadem, rongsen aser shisatsü agi aochia temeim mapa tajung sayuogo, nenok ajak dang temulung taroktiba nungi kangasa pelaba lemsateper.



Tsüngrem takarsangi nenok temeim mapa tajun asoshi talubosa moajangma ta ozü tamang sarasadem.

-Temeim Kinungbo aser Kinungertem

In the Court of

Principal District & Sessions Judge

Mokokchung: Nagaland

S/C NO. 183/2021

NOTICE

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/pension benefits of Late Talirena has been applied by Shri. Kikumwati H/o Lt. Talirena R/o H.No. 303 Artang Ward, Mkg. Nagaland for possession of:

GPF, GIS, Gratuity, Leave encashment, pension etc, Closing of A/c. Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 23.10.2021.

Given under the hand and seal of the court on this the 23.9.2021.

Sd/-

Principal District & Sessions Judge
Mokokchung: Nagaland.

NBSE-i VVM atema metetdaksür

Dimapur, Rongjui/September 28, 2021 (TYO): Class VI nungi XI kaketshirtem tsüingda science wadang tali metetta/rajema lidaksütsü atema Vidyarthi Vigyan Manthan (VVM) ya national programme ka lir, kong kaketshirtem rongnung scientific aptitude' tsütsü sempet tajung alirtem jangjatetsü asoshi achaayanga sentong ka asütsü, ta NBSE sangdong ajanga metetdaksür.

Vidyarthi Vigyan Manthan (VVM) ya Department of Science & Technology, Government of India aser National Council of Educational Research and Training (NCERT) kübok Vigyan Prasar den Vigyan Bharati (autonomous organization) longjemer achaayanga mapatong ka lir.

VVM ya national level nung achaayanga agiba 'online open-book science talent search examination' ka lir, kong kaketshirtemi pei pei kidang nungi digital device talisa smartphone, tablet, laptop, desktop tem amshia iba online tatidang nung shilem agitetsü akok. 2021-22 atema School Level examination ya India tesem ajunga nung November 30, 2021 mesüra December 5, 2021 nü, mapang mashi ka nung minute 90 atema anepdang 10.00 ako nungi aonung 8:00 ako tashi agitsü sentong lir.

School Level, District level aser State Level nungi iba online tatidang nung takok angur kaketshirtem nem shilem agiba certificate/merit certificate agütsütsü. National level nung takok angurtemi-- Himalayans (18 students) aser Zonal Level nung takok angurtemi (72 students) linük indang nungtugu

R&D labs nung Internship-cum- Extensive Training programme (SRIJAN) agitsü asoshi maongka angutsü. Iba den külemi Himalayan (18 students) nem Bhaskara Scholarships agütsütsü.

Iba den bendenloksema, register ser alir kaketshir ajak atema Mega Nation-Wide Experiment nung shilem agitsü asoshi VVM 2021-22-i maongka balaka agütsütsü. Mega Nation-Wide Experiment ya kaketshirtem chiyongtsü achi-ajemba yimyatem, parnoki achi-ajemba chiyongtsü indang nutritional jenjang aser item inyakim dak sendakba nung ajemdaker agitsü.

Kaketshirtem tsüingda 'observational skills', 'scientific mindset' aser 'analytical thinking' yimyatem angazükdaksütsü aser amshidaksütsü nükjidong nung iba mega experiment ya agir.

Iba maparen sendakba nung, science tesayurtemi sentong yimyatem/ inyakim metetta alitüsü aser iba sentong nung shilem agitsü asoshi parnok (tesayur) ajanga kaketshirtem ajungshidaksütsü atema, NBSE kübok register ser alir reju (School) tekolakpur ajaki pei pei school nung science tesayurtem dang October 1, 2021 nikongdang 4:00 ako meta Zoom meeting nung adentsü asoshi metetdaksütsü tetuyuba agütsür.

Iba meeting atema, link' aser ID' tem District WhatsApp group ajanga yoktsü. Registration aser iba sentong dak sendakba nung osang tejangja agitsü atema www.vvm.org.in nung tongtepretepsü akok, ta kasa sangdong nung shia lir.

Nalin S Kohli-i Old Riphym Tourist Village semdang

Wokha, Rongjui/September 28, 2021 (TYO): Hombarnü (27.09.2021), BJP National Spokesperson aser Nagaland indang 'Prabhari' (in charge), Nalin S Kohli-i Tyui 37 A/C constituency, Wokha District kübok Old Riphym Tourist Village semdang aser BJP karyakartas tem den sensaksema liasü, ta sangdong ajanga metetdaksü.

Kohli-i, party maparen tashiita aser takok ngua aotsü asoshi ajaki meranga inyaktsüla; aser tongtibangsa yimtsüng tesemtem nung nüburtem dang party inyakim aser sentong metetdaksütsüla, ta ketdangsur aser karyakartas

ajungshia liasü. Ato Kilonser, Narendra Modiji indang nükla aser mapatong tem, kong lenla ajunga nung terenlok lidaksütsü aser nüburtem ajungkettsütsü asoshi nükjidong yur inyaker, item ya asangsang nung atalokdaksütsü atema ajungshitepa aser longjemer inyaktsü nüngdaker, ta metetdaksü.

Kasa sentong nung, State Deputy Chief Minister Y Patton-i, Nagaland State atema aria bilemja aser lenmang balala ajanga nungita yariba atema National Spokesperson, S Kohli dang pelaba metetdaksü aser tarutsü nunga State nung nüburtem asoshi maneni

amalitepa inyaka aotsü imlar, ta lemsatepa liasü.

"Yimtsüng tashi aruagi asenok den ajurutepeba ya pai (Kohli) State nung nüburtem atema aria bilemstsüba mapa agi sayur," ta Patton-i shisem.

Old Riphym Tourist Village semdangba mapang, Wokha district BJP Karyakartas aser Old Riphym indang Putu menden ajanga S Kohli pelashishia agizükogo. Iba Tourist Village semdangba mapang, National Spokesperson & Prabhari S Kohli den state Dy.CM, State BJP ketdangsurtem aser district karyakartas tem dena liasü, ta kasa sangdong nung shia lir.

Kohima nung Football referee clinic tenzükogo



Kohima, Rongjui/September 28, 2021: IG Stadium Kohima nung Kohima Town Club züngsemtem den training agirtem külemi tangokba noksa ka yangi angur.

Kohima, Rongjui/September 28, 2021 (TYO): Mongolbarnü, IG Stadium Kohima nung Kohima Town Club (KTC) ajanga ayongba football referee clinic tenzükogo. Iba clinic anogo pungo tashi agitsü, ta sangdong ajanga metetdaksü.

Iba training sentong nung, Kiphire, Phek aser Dimapur district nungi referee densemanisung 27 (tebur 23 aser tetsür 4) agi shilem agidar. Iba clinic nung instructor temji, All India Football Federation (AIFF) referee instructor Joy Chandra aser national referee Priyo na asütsü.

Iba clinic lapokba sentong nung, Z Kire, IPS, Rtd DGP Nagaland aser Club indang Adviser-i, shilem agirtem dang maangka ama agia temolung agüja angazüksü asoshi ajungshia liasü.

Kire-i, training agirtem asayar tajung akümtsü asoshi ajemalutsü aser training agiba amajok mekümdaktsütsü asoshi ajungshi aser training agirtemi kenü anogo pei

sempet ajanga World Cup asayamung nunga referee ama shilem agitsü imlar, ta lemsatap.

Naga nunger dak football asayatsü aser tangar menepa asayatetsü sempet lir. Iba nungtugu saisapong ya ball dak metsülöksüba mesüra ball metsüshiba kisung masü, saka tasa amshia asayaba saisapong ka lir, ta pai ashi; anungji referee training agirtemi saisapong yimyattem rajema alitsü nungdaker, ta pai ajungshia liasü.

Iba den külemi tawa tanü, football dak sendakba temzüng aser inyakyimtem, koba mapang shia melenshir, itemji meteta alitsü asoshi pai training agirtem ayongzük.

Iba training nung tetsürtemi shilem agiba ngiay, Kire-i, Nagaland nung tetsür football team kangarabo terenlokba mali, saka iba nung tetsürtemi tezü metangi maneni shilem agitsüla, ta ashi.

KTC president Dr Viketoulie-i, taküm Covid-19

tensa süngjema maoba ajanga, Football League melen, referee clinic ayongzüksü Club-i lemtet, ta ashi.

Nagaland nung, saisapong tongtibang rongnung football ya asünung, referee tajung adokdaksütsü kanga nungdak, ta pai ashi.

State nung football saisapong ajungkettsütsü nükjiong yur KTC-i inyaker. Anungji lenla aika nung saisapong jenjang melenshitsu nungdaker, ta Viketoulie-i ashi.

Anogo pungo tashi ayonga agiba clinic ajanga shilem agirtemi tasen aika angazüksü aser nenok sempet ajanga iba saisapong jenjang tali dang ajungkettsütsü imlar, ta paisa ashi.

Maneni, Football referee clinic nung, practical training, fitness test preparation, positioning aser movement, referee discussion, laws, recovery, video test, video analysis aser tangatem achaayanga agitsü sentong lir, ta kasa sangdong ajanga metetdaksü.

Neeraj nem Dhyan Chand Khel Ratna Award agütsütsüla: Bhutia

New Delhi, Rongjui/September 28, 2021 (Agencies): Taoba mapang, India football captain Bhaichung Bhutia, shiba National Sports Committee nung dena liasü, Mongolbarnü, pai ashiba agi, Tokyo Olympics nung gold medal angur Neeraj Chopra nem taküm Khel Ratna Award agütsütsü langa lir.

Tokyo Games tebur javelin tetoktepba nung, Neeraj-i metre 87.58 shi yoktetba sülen, Olympics 'track & field' tsütsü India atema pai mezüng gold medal takok angu.

"Taküm committee puri tayongzükba jenti ajurutsüsa akümtsü, kechiyong award angutsü asoshi asayar aika temsüa lir; aser taküm dang masü saka küm shia award agütsütsü asoshi committee puri tayongzükba tulu ajurur. Ajisüaka, taküm küm iba inyakyim (selection) kanga agi tasakba asütsü, kechiyong medal balala takok angur ath-

lete aika dang lir aser Dhyan Chand Khel Ratna Award ya Tokyo Olympic gold medal angur Neeraj Chopra-i angutsü ama bilemer, kechiyong Olympics track aser field asayamung nung India atema pai mezüng gold medal nguogo," ta Bhutia-i ashi.

SAI indang 55buba Governing Body Meeting dak sendakba nung Bhutia-i, "Iba senden takok ngua agiogo aser Sports Minister Anurag Thakur-i saisapong indang jung junga metetta lir. Iba senden nung onük balala benoka olemtepogo aser linük nung saisapong wadang ajungkettsütsü aser coach timba anitetsü; iba den külemi asaya tesem nung stadium masü saka moapu (ground) tem saisapong agi melaba/saisapong dak apet tajungba achaayanga yanglutsü asoshi jembishinüogo, kechiyong asaya moapu dang shitak lira saisaponger tajung aika

adoktsü lenmang lir. Ano, linük kübok tesem tilala nungi saisapong tsütsü sempet tajung alir asayartem jangjatetsü asoshi ketdangsür timba shimtsü aser mapa nungloksütsü asoshi senden nung olemtepogo," ta ashi.

Indian Football indang asüngdangba mapang, Bhutia-i, "Tarutsü asoshi asalentong tajung yanglutsüla. Tang tashi nung iba saisapong tsütsü maparen junga meinyakteti lir asünung, iba wadang tejakleni bener aotsü asoshi mapang agitsü," ta ashi.

Mongolbarnü, Union Minister for Youth Affairs and Sports, Anurag Thakur-i, Sports Authority of India (SAI) nung Sports science aser performance management system tem balaka achaayanga inyaksü.

Olympics asayamung nung, India nungi athlete timbai takok angutsü nükjiong nung iba telemtetba agir, ta sangdongogo.

Men's U-19 Vinoo Mankad Trophy Nagaland-i Manipur kokogo

Dimapur, Rongjui/September 28, 2021 (TYO): Mongolbarnü, Ranchi nung Nagaland aser Manipur team tsüngda Men's U-19 Vinoo Mankad Trophy asaya liasü. Nagaland-i Manipur madak wicket 6 agi iba asaya kokogo.

Tzünglu aruba ajanga, iba asaya over 38 (team anaprongla) dang asaya liasü. Nagaland-i toss koka fielding asütsü shim, kong over 36.2 nung Manipur team-i run 170 yanglu aser asayar ajak out süadok.

Manipur atema, Suresh Singh-i run 80 aser Dominic-i run 30 yanglua liasü.

Nagaland team nungi bowler Neizekho Rupreo-i wicket 3/33 (8 overs), Kelhousilie Zaputou-i wicket 2/16 (4 overs), Raja-i wicket 2/27 (6.2 overs) aser Odilemba-i wicket 1/28 (7 overs) agi.

Tanabuba innings nung, Nagaland team-i over 34.5 nung run 172 shi tongteta iba

asaya akok. Iba asaya nung Nagaland nungi batsman 4 shi out asü.

Nagaland team atema Thejasilie Savino-i run 53 (not out), Sujal-i run 31 (not out), Nripen-i run 20 aser Neizekho Rupreo-i run 19 yanglutet.

Manipur atema Jotin, Kalyan, Vivekananda aser Somokanta nungeri wicket ka ka agi.

Nagaland team nungi Thejasilie Savino-i iba asaya nung mezüng shilem agia liasü aser pai half century yanglutet.

Brehostibarnü (29-09-2021) Men's U-19 nung Nagaland aser Meghalaya asayatsü.

Maneni, kasa asayamung Womens U-19 One Day match nung Mongolbarnü, Nagaland aser Arunachal Pradesh na asayatsü renem, saka tzünglu kanga arua aser MET ajanga yipru süitsü tekümdangtsü agütsüba ajanga iba asaya athi aser asaya anogo atsülangtsü.

Nagaland tetsür team atema asaya telemasa yamai alitsü:-	
30-09-2021:	NAGALAND VS ARUNACHAL
01-10-2021:	NAGALAND VS MEGHALAYA
02-10-2021:	NAGALAND VS J&K
03-10-2021:	NAGALAND VS SIKKIM
04-10-2021:	NAGALAND VS MANIPUR

Inzamam mozüki nungi anizükogo

Lahore, Rongjui/September 28, 2021 (Agencies): Taoba mapang Pakistan captain aser batsman mongin Inzamam-ul-Haq mozüki nungi anizükogo, ta sangdong ajanga metetdaksü.

Hombarnü, Lahore nung Inzamam ajungbena dang temolungjang agi mapa meinyaki akümba sülen, surgery agitsü atema pa mozüki anir ao. Arishi küm 51 tain Inzamam, mozüki nung angioplasty surgery takok ngua agiba sülen, pa temang tajungba aküm aser mapang tatsüka mozüki nung munga liasü.

Inzamam, shiba Pakistan cricket team captain rongnung tajungtiba ama ajaki züngshir, tesüba anogo asem shi pa teko nung tashitsü atua timtema liasü, ta ESPNcricinfo sangdong ka ajanga metetdaksü.

Mozüki nung mezüng temang reprangdaksüba mapang, pa temang nung timtem kecha meputet, saka Hombarnü pa temang

tendangba mapang, Inzamam temolung agi mapa meinyaki aküm ta doctor temi timtem putetba sülen ajungbena dang pa surgery agia liasü.

Otongdar kati ashiba agi, operation takok ngua agiba sülen, Inzamam temang tajungba aküm, saka mapang tatsüka doctor temi pa temang repranga aru. Tang, Inzamam mozüki nungi yokadokogo.

1992 küm Pakistan-i World Cup takok anguba mapang, team atema Inzamam-i tongti shilem agia liasü. One Day International cricket asayamung nung run timtiba yanglur Pakistan nunger cricket asayar rongnung Inzamam asütsü.

2001 aser 2007 küm tsüngda Inzamam-i Pakistan cricket team captain inyakogo, iba sülen, pa international cricket asaya nungi anenadok. Cricket asaya nungi anener külen nungi, Pakistan cricket nung pai mapa balala inyakogo, kong tesüsa 2016 aser 2019 küm tsüngda pai chief selector ama inyaka liasü.

BILEMDANGANG

"Meinyaki dang bilemba kisung jagi mapanungshia maotsü."